





紫栢老人集卷之十三

詩 五言古

宿洪福寺懷古

浮生若電露豈有山河壽磨筭高入雲還同天地久  
其誰張麗筵夜半操銅斗逐鹿不畏險攫金寧顧醜  
滹沱鎮長流覆宿千峰首骨肉靡暇念後心若淵藪  
霸功高幾許直道難箝口野寺秋風清塔鈴解獅吼  
燈前聞草蟲更復悲蒲柳

山居

憨山德

清閣





鳥道曲復直迢遞通幽寂枯松學龍舞怪石疑僧立  
香雲襯足柔清磬聲歷歷老衲笑相迎有意非言說  
宿可休堂

野人無心來寧復有心去來去總無心白雲知所趣  
幽篁一徑通落葉四簷聚念此夜露寒草蟲鳴不住

紺圃卽事 二首

無風水自定水定涵太虛四岸交清陰竹槐何翳如  
游鱗戲樹杪天影看却倒去者亦幽人有情難盡道  
夕陽澄紺圃淺港動蘭棹

十居在野曠寂無塵俗想疎鍾深夜聞六根瀉清響

晝讀天竺書幽窓思恍憐犬吠桃花陰麥浪人來往  
最愛晚雨晴空林反照爽

芙蓉寺跨雲梁

白雲不知畝折竹爲輕帚幾度掃復合流泉觸石吼  
望中峰巒奇欲往未敢走老衲駕津梁去來恐怖否  
患媒以有身墮體無堅朽達者旣知此死生何好醜  
經殘磬亦歇豈更聞鷄狗

龍潭靜室

睡起帶微昏拭眼出禪戶碧天紅日高雲山光可睹  
倚闌聽流泉橋上孰爲伍岩側立奇石向我石欲舞



衲僧傍弗禁於石生忌妬汝本無心物如何解玄路  
生公昔教汝吾今擬椎破一憎一愛之且道誰福禍  
了此得佛心未會大莽魯

舍下邳弔留侯

子房椎秦氣豈止萬丈虹一旦能自下進履圮橋翁  
翁怒竟弗納復進心如初苟非天地量報韓計卽疎  
佐漢功已成超然掉臂行青山去不返爲答赤松盟  
月夜泊下邳忽聞流水聲尚疑先生在感激無盡情

山居

潭柘溪山深那聞空谷音凍雲雷忽鳴日月其誰心

塔前解放光此照無古今老人不負渠影響渠有餘  
渠能不負老在處皆迢如

白仁岩

誰云山路險我覺山路幽空林鳴落木斷壁瀉寒流  
徑曲難可記雲閒時復留樓臺斜礙石松栢老成虬  
拭蘚讀殘碣遠公豈凡儔五篇悟今古六事羞王侯  
危峰代主人玉雪泛磁甌蓮漏滴弗涸棋枰局未收  
悲歌曳杖去日暮不勝秋

夜坐上方山卽事

頭戴古人笠夜禪松露泣怡然醉遐曠想是多生習



雲鎖兜率門人來撥雲入瑤梯知幾層攀援鐵繩急  
舉眸見樓臺重疊峰巒岌磬韻瀉空翠清泉道者汲  
水窮路亦盡相見惟合十茶罷揮麈尾雄談匪服給  
中岩月未沈謝法且長揖貪睡但畏曉那復顧衣濕  
潭柘山一音堂寄懷靜光滑居士

世路多崎嶇悠悠寄巖谷去來惟白雲天地亦茹屋  
渴有泉可飲耐饑松克祿明月上東峰貝葉聊披讀  
會旨忽喪我虚心而寔腹愛生死媒進忘所能豈獨  
辟若古寶鏡無塵光自復松邊坐良久介爾一成六  
天水本不遠亦寧非五竺行蹤顧難留薦茗誰擊筑

邂逅雖可期江山阻人目搖搖莫盡思卷來托茲幅

晨起蕭岡納涼

煩暑不可滌扶筇傍溪光偶然值幽陰輕風發林芳  
新荷浮湛露閒雲停蕭岡遠山旣以淨遠水亦以長  
眠鷗驚復定吾與我亦忘寂寂花暫落浪浪溜鳴廊  
雖有合塵心其如法中王爲問西來意倒影泛虛堂  
日暮歸自龍潭

利名非烟霞牽人不辭遠泉石非美酒醉我不知返  
狂笑出重幽殘陽沒松坂

長松館夜坐



禪庭就樹縛草徑遠塵寰有時鳥相語無人來叩關  
江聲雜松響飯訖聽潺湲染習漸將洗靈臺似近閒  
許詢解設難支遁答非慳莫問城樓月潯陽照碧灣  
山居卽懷  
峰泉本嚴好何必修飾之疏食飲水外白雲可悅怡  
放言慙末德危行竊與期麋鹿散還聚詩書忘復思  
相知嫌地遠誰共嚼紫芝

仲夏攜覺生受食芙蓉山中

閒將飯袋子共爾納涼此雲鶴棲高松池魚玩清水  
有心豈得妙無念墮寂止前識古不貴朴哉智之始

歸鴉點暮烟杖履懷故里

覺生訝講絳二韻險絕難賡和予應聲賦此首二  
明珠藏老蚌蕩漾吳門港一旦誰剖之圓光照佛項  
談經不須舌直示但用棒高枕臥頽巖松濤代畫講  
松窓匪貴絳常以雲爲巷雨歇千山寒流泉隨勢降  
林鴉噪夕陽碧漢浮彩虹村落牛羊歸晚鐘何處撞  
人生特寄耳埋骨無賢贖

題骨香庵隆公靜室畫梅

萬木凍欲死枯槎銜春色禪房午夜寒明月挂枝側  
彷彿暗香浮鼻根不可識支郎定初回瘦影橫癯肋



此意向誰言冰魂自相得鹽梅非所望投老終佛國  
悼無相容公

是身如丘井聊以命爲綆汲久終必斷世中有誰省  
輸他達道人念起恒自做生滅本一條見形卽知影  
去來有異同諠寂靡炎冷刁斗聲弗停沙門觀力猛  
未死恣昏動含識豈超穎遠公之清塵師歿孰爲整

悼如超

往曾見吾影寔未得吾心見影雖植因得心道可尋  
死生非細事神寂昏不侵苟非得道骨安能無浮沈  
難消是五障易失惟一音新塚遍芳草松風多悲吟  
誰有堅固經鳴此無生琴

哭素菴師

棲霞久岑寂泉石漸光霽願力洒心血禪宮始壯麗  
青山色不老碧水流無滯舌相與德容見聞安可契  
師來素着物師去猿亦涕愧我徒識師弗堪支傾替  
東南法梁折苦海浩難濟小子瞻白雲幾回淚沾毳  
長松館西風吟

朝來坐庭除木葉墮不歇未是西風高千林如脫髮  
林林成比丘遠近坐兀兀無口舌豈勞妙音從手發  
門人聚白雲聽法誰敢忽以眼爲耳根聲塵迥超越



長松強出頭夜靜挂明月萬籟寂不喧月明滿禪窟  
閒中度朝暮所見何賞罰

燕山送無言道公住持少林寺

青山不易老白日何其短葉落黃金臺誰人行急緩  
四泉清且深五乳秋雲滿取汲豈有心爲霖濟枯旱  
苟非善用之雖正亦復反鉢樹旣成抱帝座香未散  
椎輪久失主賞罰貴明斷祖令試全提波旬應左袒  
焦螟泊火聚燕雀秋鵠卵直下不生心聖凡俱納款

芭蕉菴偶成

誰謂城市諠我居若空谷晨昏雞犬聲誤聽作岩瀑

庭際羅雲石微風撼疎竹故人家務忙誰共法海沐  
石門寺

我愛石門寺臨川清曠處業當水月深道益魚龍助  
帆影亂幽窓櫓聲搖靜慮南山及峨眉併換終不與  
讀法華經

一室住峰深樵夫猶莫尋日永閒不徹獨轉蓮花經  
自誦還自聽問渠誰賞音及復細推究本來非二心  
如何根塵識三者各有因使我疑難解取決白雲岑  
白雲亦弗答隨時變晴陰

梵川



水曲午風清輕舟浪花淺主人遊未歸碧草坐來軟  
有茗向誰啜有心向誰展青春感逝波白日應共勉  
何必觀滄溟乃稱雲濤緬崑崙與培塿會理非隱顯  
島嶼壘塊成池塘貴折轉水澄見樹影隔岸雲舒卷  
中流構精藍荆棘試初剪魚鳥識香燈兒童慣習善  
輞川王右丞泉石寄軒冕今有曲阿生梵川託幽選  
道人偶飯茲細雨濕蒼蘚理棹向何處北園少鷄犬

過石鐘寺

長江水不淺湖口山不深雲石多奇巧疑生丹青心  
予借二三子取次望春林何異畫圖上歡笑發空音

假山與真山象始可相尋

過匡廬棲賢橋

我昔遊峨嵋峨嵋青雲間巴江瀉天上千里一日還  
今來匡廬陽峰巒潛復翔玉淵溢必泛三峽何鏗鏘  
行倦坐橋側鳴珮聲琅琅聞遺心獨清觀音舌相長  
幾人度流水卽影見慈光

風塵通觀

風塵齊水月染淨但唯心試看匣中鏡澹然光靜深  
一朝縣高臺萬像等照臨好醜織不昧未嘗煩沈吟  
予心得如此寧畏風塵侵



棄杖

柳栗何所生托根峨嵋石偶然棄此山尊者何得失  
且以四塵觀推之本無質寧惟此杖哉萬物同一職  
贈馬子善

堤上垂垂柳堤下青青草等閒清遊時文章皆極妙  
不假彫琢工天然而自巧借問此何來胸中無煩惱

贈明月寺皎如

古寺負靈岩湖山最深處微塵固難近心遠本非預  
流水解清談白雲好來去經殘坐松下調息澄俗慮  
明月懸高天空床任箕踞莫憎青白眼身世等飛絮

山中卽事

粥殘無所事策杖尋幽去岩下聽流水泠然爲誰語  
天寒茗弗熟霰重晝匪曙此本龍蛇鄉廓然忘怖慮  
談笑殊未休日暮難久據月上還再來何必生猶豫  
過天寧寺 有序

余讀唐李長者決疑論是知無爲而成者天也應  
物而不亂者寧也故古人有以櫻寧自號者亦此  
早春攜二三法侶謁李長者於方山旣而還清涼  
以滹沱冰將泮徘徊未渡少憇天寧遠公禪房賦  
此



年華不可留齒髮豈堪倚既少終必老逝波力難止  
無生則無死有未必窮始岼柳夢欲醒桃花尚含恥  
同誰遊寶地歎茗談莊子一嘯出門去千峰興方起  
方山金剛泉  
丈夫患軟暖任事不耐長一歇金剛泉形骸頓堅強  
視生與死等視苦爲樂場此觀久成熟身心俱清涼  
送得心開士遊五臺

牢山去五臺相近亦相遠近則在刹那遠則靡涯岸  
生心禮文殊何啻太虛電轉眼光已沈掌紋不可見  
秋高風色寒落葉情無限望望孤雲遙令人增眷戀  
讀經曾敷蓮陸地清馨遍今昔俛仰中千里寧隔線  
大士笑相迎茗貯玻璃碗鼻風生浪華香光搖臺殿  
無錯箭鋒機掉頭空絕巘

月下讀書

天高秋露寒玄侶皆寢歇油濁燈頗昏讀書借明月  
得朋古始初會理心自愜釋卷夜已深清光滿岩穴  
過龍門靜室

羊腸路高低深林秘禪宮既到坐門次重疊皆雲峰  
剝木三百尺閣石架虛空寒泉委曲瀉點滴落厨中  
昨見僧頭上水聲來匆匆相看拍手笑王維難形容



惟有無心者會旨超塵封

春日登清涼

昨來進幽谷草木時雨足欣欣向人笑紅黃間紫綠  
揮戈日難返流泉去甚速正思東家丘川上嗟不復  
蚤春謁李長者著論處

高人李長者風致久欽尚問法蒲衣子從茲乃西往  
青山不改色白足遞酬唱人代付流水雲巖獻奇狀  
芙蓉繞禪室貝葉生佛想春雪被四野玄津滌五障  
華嚴佛始談大論誠快暢恨我生何晚不遑奉巾杖  
猶欣侍尊者龍象共趨蹌夜寒山路幽再宿解悽愴

尚朴崖

予非太古人君是太古石今昔甚懸遠一朝此相識  
因悲世道衰尚友千古客奈有峨嵋遊匪遑久侍側  
雲邊言別離杯茗瀉惻惻敢企明月心常相照行識  
飢鳳林寺有感

昔人依寒巖虎豹常爲伍片心委寂寥頽然混沌父  
古木不知春鳥不驚樵斧一旦陽光回白雲化丹圃  
我老欲投杖已生峨嵋羽

食菜

莫嫌菜味淡淡中趣甚長長者可以久久則耐歲霜



人謂梁肉美我愛菜根香東坡曾有言大丈夫須嘗  
淡泊滋高明奢侈汨心光節儉可成家費則近淫荒  
聽我冷舌言天下亦可康

### 山堂夜坐

空堂澄佛火寒月照僧笠俯仰天地間冰壺喻不及  
微雲淡欲斷野鳥雪枝集迴嶺互明滅流泉凍弗泣  
相將坐達旦行者頻乞入所樂既難齊滄海豈牛習

### 秋夜宿積善庵洪上人禪房

號大宗

微雲散空碧片月當天縞獨聽草鳴遺塵契深奧  
緣粗而得精精化合常道日擊猶千峰語言豈可到

虛窓涼初高擁毳坐來好黃葉飄秋風夜中誰復掃  
潭柘一音堂卽事

三界如旅泊比丘寧敢着去來類孤雲足跡難可摸  
樹下只一宿遲回恐生縛雕梁與畫椽眷顧詎非錯  
末世風俗澆鬚毛徒剝削酣然醉大欲男女飲食樂  
雖復着袈裟諸方亦行脚研窮本色事凝默熱惱灼  
一旦死魔至惶惶何所托

### 吳江聖壽寺

吾愛吳江山浮杯恣幽尋又愛吳江水臨流閒照心  
城中有古寺銘碣何埋沈偶讀高僧傳赤烏到於今



佛燈斷復續棒喝振雷音禪虎瞎堂老昔曾踞此林  
殘碑陷新壁每動騷人吟近世微某公幾遭荆棘侵  
何其棄而去令我彌愴襟山豈貴必高水安貴在深  
寸虛苟無欲朝市卽雲岑曠然離苦地誰解投簪纓  
名二泉詩 有序

余遊廣慧寺見一泉湛然明瑩歡喜心生熱惱自  
消因名之曰歡喜泉復見一泉淙淙然瀉諸龍吻  
若枯禪大龍神遊覺海慧濤洶湧之中而不撓乎  
澄潔之性有卽動而靜彷彿乎禪定之象名之曰  
禪悅泉後之高入勝士過廣慧者皆生歡喜入禪

悅庶無負名二泉之心乎

歡喜泉

千峰有流水一見何皎皎歡喜油然而生相將山月曉  
掬之開妙觸直下無不了夜靜鍾磬歇清音瀉叢篠  
更聞洗鉢殘惹得游鱗遶

禪悅泉

商者見利喜農人得雨悅空山萬籟寂老衲默無說  
所樂雖不同適懷寧優劣寒飈吹微雲凡聖情波徹  
過某公禪房

鑿破千尺冰雲邊結方丈漁樵絕往來天地同俯仰



不見喧笑聲但聞流水響山深遊子稀夜靜明月上  
把袂論素心忘機冥大象爲烹虎丘茗已接鶴膝杖  
何處動疎鍾此時誰撫掌人生若漚泡莫使煩惱長  
高豎精進幢共超無明網

寶珠泉

有序

嘉靖間有禪者不知何許人雲行鳥飛足跡滿天  
下而愛杭之徑山山有凌霄峰高出羣巘石少土  
多可以樹藝然以乏水棲者不能久此禪禱於龍  
神一旦泉湧成掬更三日泓然厭沃龍象矣萬曆  
壬辰仲春自杭來五臺言其始末如此遂賦之

寒流迸絕頂清冷遠泥滯午夜微雲空冰輪印滄洞  
誰披破衲頭分玉注爐鼎熾炭三沸初浪花明珠並  
試傾磁甌中一啜禪夢醒

芙蓉寺

千峰有流水碧沼有明月承坐香雲柔此心何所闕  
美人秋思深肯向岩隈歇麋鹿去復返孤鴻天際沒  
滿城夜露寒燈火照佛國鏡裡浮幢新山河壯禪窟

重過樓煩寺

至人將欲誕寶地湧靈脉飲者無賢愚俱然消諸厄  
一朝產金芝佛日生大夕千古鳴法雷舌根等堅石



樓煩師之里爾我悲陳迹廬嶽秋風高東林止蕭索  
聰明泉未枯勝井塵土積搔首共躊躇哀鴻催白髮  
敢承聖者光分燄照蠻貊况復中華生自來露法澤  
慚余道力衰匪及爲輝赫

玄岡山店別寧武諸法侶

偶然飯山店法侶勤正念反視身與心豈殊速閃電  
百年喻朝露日出花卽歛寵辱鏡上塵本光謾相染  
秋風催馬蹄去去情無厭

過清涼義塚園示某禪人

艷姬遊花林過者誰不讚白骨亂荒草見之誰不嘆  
從來百年中好醜隨時判嘆者未死時容儀何粲粲  
讚者埋黃土白骨同一貫佛說女三昧卽身成境觀  
比丘住尸林攝念厭分段如觀一枝花洞悉春無畔

過華嚴菴

流水青山曲誅茅拭心鏡法界雖四重了之凡可聖  
風高鐵磬寒月上松窓淨莫謂故紙厚鑽研力須勁  
一塵忽剖破大藏頓究竟且說春光深杏花正當令  
浮生能幾何誰悟身爲病

驅旱魃 有序

予道興善寺觀麥苗枯槁知魃鬼爲祟遂賦詩驅



之期雨足爲驗

苗麥仰甘泉赤子饑念乳我自清涼來久離執惱伍  
行中覩枯槁魃鬼握炭斧喜旱暢淫習羣生失所父  
民以食爲天麥枯將誰怙聖哉大悲覺雲澍滋朽腐  
遐邇聞雷音妖嫚墜幽苦

偶成

長年只蕭洒靡事可牽掛山河喻蒼狗生死齊野馬  
曹劉無幾豪榮枯轉頭罷輸與世外人金剛虛空畫

五言律

開化寺有感

建勝自隋唐燈傳不計霜幢高文字古碑臥蘚苔蒼  
雨過金容泣花開鐵釜香登臨曾感慨槐冷鎖斜陽  
散髮受食芙蓉山中

散髮長林下清歌傍碧渠水流天影在風靜竹聲虛  
路出雲松杪心遊象帝初上方誰送供香飯及池魚  
客多勝閣

寡欲地終偏忘機趣自玄帆檣爭碧浪日月走青天  
耳寄江聲外心遊象帝先人間通覺路登眺石門邊



日暮二首

風落春時葉塔生雨後苔門前雙樹老竹外片帆開  
高塔啣沈日祗林隱鏡臺遙看情不盡宿鳥促歸來  
日莫泊灘頭隣船燈火浮地高疑傍斗天暗自停舟  
春煖衣初減江清興更投殊方皆逆旅鄉語信蘇州  
雪中有懷

寂寞空山裡連陰雨雪重鶴愁巢樹折猿慮洞門封  
草木應難辨山川彷彿同誰能明此意夕霽上方鐘  
潭柘元日聽泉

一年今日始寒谷煖初生松下浮天色雲邊領磬聲

翻然辭絕壑此去向滄溟吾道秋風冷波光浴日明  
山居

住在萬峰深遊人何處尋斷崖能障路流水自成吟  
白髮生空想青山冷世心那知城市裡正晝攫黃金  
過報恩寺

一棹到禪居溪山春雨初宿雲橫古砌遺像臥荒墟  
斷碣迷唐額空梁得宋書同游皆法侶誰可振門閭  
明月池

老衲閒消遣雲邊斫此泉淺深不可測今古但澄然  
照影渠看我涵虛地壓天夜寒羣籟寂明月幾虧圓



秋夜宿本侍者禪房

儂家所住處長日少人踪水月四時有雲山幾萬重  
黃猴偷紫芋白鶴立青松夜靜成孤坐燈前孰所從

遊張公洞 有序

暮春與二三子遊張公洞玉女潭舟中披閱支公  
小品序倦而舒目忽見舟前碧翠浮空波光映几  
時高論者清難雲構虛懷者瓶瀉而酬次復  
策杖尋樵徑而入既至蒼松夾道修篁點黛恠石  
亂出清泉滴響仙源幽勝應接不暇時有小作雜  
記其事雖無雞園鹿苑法咏之倡和亦一時之良

遇也

微波搖樹影風好片帆輕望裏千峰秀行邊一水清  
高言消永日搜閱托幽情相去桃源近時因法伴登  
北園雜咏

閒來無所事觀化適幽情鳥路生明月魚程混太清  
蒼山常問寺濁世不留名雲外存知己前峰鐘磬聲  
泊湘中

日暮停舟處蒼茫古渡西雲霾江上月雨濕客中衣  
行侶鄉音異隣船燈火微故山千里隔迢遞不勝悲  
巖居卽事



潛壑堆雲處寒泉不斷流千峰長鎖翠六月只如秋  
蟻鬪驚天地人空恣馬牛山林與城市心歇便相投  
留別愍公

大道久荒涼離歌東海旁行踪將萬里津濟正微茫  
白日肝腸苦青山骨肉香相逢卽相別揮淚欲沾裳  
示于潤父

寂寞英雄地浮華計不深好花開萬品古木獨千尋  
路盡生奇智言窮得自心封侯西海上白骨博黃金  
過邢匡石居士

朝來居士家一路踏烟霞會理花非待開池水有涯

石橋當戶險山郭帶江斜飯罷無餘事空窓轉法華

同開侍者繆仲淳宿洪福寺

有序

昔思大禪師登南嶽恍若舊遊因掘地得髑髏及  
瓦鉢道具遂創招提以三生名之貧衲與二三子  
過洪福寺四顧躊躇亦若舊遊第不知前生髑髏  
何在雖然卽非髑髏瓦鉢思大前身爲南嶽風月  
主人猶信也洪福由唐迄我明廢興不知凡幾  
其寺僧慈峰朝公今復力舉廢墜而貧衲與二三  
子阻雨得假信宿朝公索詩題石遂賦此以結三  
生之緣時萬曆丙戌夏六月十有一日也



信宿中流寺行藏支許從禪居開水月佛光照魚龍  
石吊英雄跡雲埋今古踪廢興無限意問取舊栽松  
牢山海印寺

珠林完舊物天子錫靈文鳥道懸丹嶂僧堂起白雲  
魚龍階下宿塵世海邊分佛火誰相續心香朝暮熏  
梵川偶作

情縱頭頭礙心空事事如死生雖復大來去總由吾  
貯水煩滄海關風役太虛諸般皆便用何物可能愚  
石門舟次

石門前代寺澤國隔塵氛四面皆流水孤峰獨出雲

寂音陳世界長者列經文舟到黃昏裡鐘聲鼓後聞

偶成 四首

折葦來初地漁人枕浪眠塔鈴閒自語僧夢醒忘緣  
井竈魚龍窟風塵水月天雖非親眼見澄照尚依然  
住山無甚巧一味朴頭來雨後開新地燈昏剪舊煤  
照心翻貝葉襯足護蒼苔久斷風塵路何人問大梅  
草坐白雲寺閒中自較量利名非我事歲月讓人忙  
飯飽松花粉烟浮栢子香流芳如可待公道屬侯王  
我自別人間空山擬投老松風六月涼潭月千古皎  
黃獨雨後肥白雲不煩掃來時路正忘欲出問誰好



少林晤高竹川襄陽復晤却贈

一別幾經霜相逢髮共蒼行蹤雲聚散此道路低昂  
多病知禪觀無才損世忙少林今夜月應復照東廊  
秋日與黑白諸法侶遊衍恩寺

秋日來金鼠西風落葉聲堤楊猶帶綠池草尚含青  
斷碣迷前代空山慨世情同行皆法侶誰解說無生

咏風

乾坤全賴爾萬物恣翻騰撼樹惟聞響排雲不見形  
吐吞真有力來去本無情一種呈奇處空山送磬聲

臥龍菴

寺藏青樹密路轉白雲深山帶前朝色人多上古心  
浮塵不可見流水自知音滿目東西意題詩期再尋

秋夜宿水月庵

黃昏泊釣臺坐聽草蟲哀水濶天無辨堂成月自來  
已醒蕉鹿夢肯使海鷗猜對岸人如粟登臨念自灰  
登那羅延窟

菩薩僧常住皈依上翠微山高疑日近海濶覺天低  
島嶼屏中國波濤限外夷重來防失路拂石一留題

金輪靜室卽事

縛屋依金刹時聞鐘磬聲種苗非博飯鋤草代經行



春水涵天碧雲山當戶青  
斬蛇誰取性拭眼證無生  
新秋念開郎

客裡逢秋早林間宿雨涼  
小鮮猶聚樂侍者却甘忘  
莫謂千山隔須知一脉長  
狂心終自歇含淚禮香床  
題張公洞

清曉探靈蹟行歌入翠微  
山光開眼界泉響淡塵機  
去路非難進浮生不可期  
洞門雲不鎖出處未成迷

題玉女潭

長松夾道陰幽勝許吾尋  
樹老寧知歲潭清喻此心  
同遊俱法侶消歇聽鳴禽  
杳藹天將酉時聞簫管聲

溧陽莊結夏念開侍者

閒中無箇事鐵鉢貯清泉  
鏡面浮天色禪心空世緣  
人生既不久幻影豈常堅  
相見難相悉開郎尚未旋  
過多寶寺弔玄庵穆居士

塵中開覺路訪勝夜登臨  
貝葉依然在蓮花誰復尋  
行踪寄軒冕名姓落珠林  
一片青天月先生萬古心  
出佛兒門別潭柘山嘉福住持佐公兼諸法侶  
靈脉來何遠溪深知幾回  
雲山常忽斷天日頓重開  
道大終難隱名高不可埋  
行當尊貴下空翠湧樓臺  
贈王太古



旅底逢王子風標迥不羣  
身家流水葉心事遠山雲  
任俠猶存劍陶情但屬文  
何如俱屏却世外一期君  
慰徐覺非

暫息還鄉思同來聚雪岑  
雲山常在目妻子不牽心  
月下搜禪觀閒中學梵音  
更憐豪縱習鑄作大悲針  
國山寺訪了虛不遇

迢遞來烟寺松門夾道生  
青山太古色流水自然聲  
石上癡龍跡林間怖鴿鳴  
西江相去遠誰慰客中情  
登天目山頂

歷盡巉巖路中峰地忽平  
捫蘿重陟險坐石看雲生  
有欲人方忌無心道自成  
相將登絕頂更覺此身輕  
馮元甫書室

逃塵寧是隱養素在蒼生  
湖水視池碧秋山筆架青  
烟雲通藻思風浪雜書聲  
永日人稀到惟聞幽鳥鳴  
舟次石門吊古

筠溪任黑風折葦石門通  
一水中浮玉孤林兩抱峰  
津梁勞佛臂舟楫濟禪宮  
歲莫探陳蹟悲歌寒霧濃  
梵川殼居二首

水國厥禪庭微舟不可輕  
波光搖閣影松吹學潮聲  
魚小知常恐龍癡睡未醒  
莫言城市近隔岸遠山青



閒來坐池館乘月弄潺湲鷺嶺浮天上漁舟放樹間  
鳥喧因論法龍出未歸灣已少尋幽者柴荆不用關  
螺髻山送傅廣居

窈窕不知深誰同此一尋聽雲天地耳抱寂聖賢心  
漢室青山在韓祠白日陰那堪離別泪春洒海螺岑  
偕諸居士登墨光亭

地僻無隣並同來日已暝穿雲驚宿鳥帶月到幽亭  
近水堪資觀虛窓可寫經漁舟催早渡風冷夜波腥  
喜于中甫再入潭柘

喜爾到山中雲門一破封聽泉身世盡坐石意言空  
明月東生海焚香禮大雄來朝今日路杖屨出千峰  
秋日登玄墓

覽勝攜高侶捫蘿謁梵宮千山飛片雨數載寄孤踪  
空翠鳴疎磬波光照遠峰烟霞誰愛客相送有支公  
過菖父寶願寺有感

新秋遊寶地落日照城隈馬跡侵蒼蘚蟬聲泣古槐  
短碑師子吼高世鳳毛才此日扶消歇還須玄度來  
同勉講主過洪山寺

舉刀無可欲斷足是何心法雨千山潤慈雲萬里陰  
清泉還似昔白血到於今古碣迷荒草同誰杖屨尋



暮秋宿龍興寺

入寺烟霞古金繩鎖梵宮譯經人不見呪水鉢成空  
漂母河邊草韓侯墓上松夜深誰共坐難聽是秋風  
示吳康虞

此生卽曉夢寵辱兩俱非三棹何時息千峰早晚離  
乾坤鏡裡象身世鼻端泥去去春程遠烟花示密機  
圓常寺次松窓宗室韻

欲濟况無舟名林亦可留樓臺片雨歇河漢淡雲浮  
水靜月方定心空境自幽慧燈明徹夜日暮不須愁  
夜讀楞嚴有感

軒冕增人相松泉冷世情微官五嶽重大道一毛輕  
石淨雲生倦窓空月愈明殘經翻未了何處曉鍾聲  
訪鹿野坪徹空禪師

林叟持高節幽居淡世情閒朝觀鶴色靜夜聽泉聲  
行道一身健翻經兩眼明自慚投社晚乞地結松陰  
清涼有感

幽谷深雲裡樓臺知幾重茜裙歌夜月緇衲醉秋風  
鷄犬聲將遍猿猱跡豈同因思張相國一怒淨龍宮  
燈下懷愁山

支郎昔住此冰雪記流年已就屠龍技猶叅伏虎禪



法雷鳴十地花雨散諸天信宿空心累焦桐擬徹絃  
山居喜雪霽

一室萬山中何人問遠公雪迷樵子路凍合蟻王宮  
照性知非染無思始契同朝來饘粥罷海日上東峯  
一微泉懷法侶

路斷千峰際雪門忽破封好山知幾疊幽草自成叢  
石徑通林杪寒泉出壁中下方諸法侶誰得此相從  
仲夏偕諸法侶游上方喜雨二首

路向平田始蒼崖似削成有天當絕頂無地可兼程  
避世雲非淡忘機水自清同來逢好雨鐘磬報新晴  
結屋近青天居高地自偏鳥鳴階下樹龍出洞中泉  
山月通宵白松風拂暑炎遙知城市裡枕簟不成眠  
五言排律

過知郎澹然齋

地僻資心靜池空悟世忙迴觀兩未有強謂是常光  
樓閣窓中影松泉鏡裏香雲山終不老水月爲誰涼  
天破魚吹浪書拋客臥床去來情不染喧寂路俱忘  
莫厭茆齋小風塵別道場



七言古

釣竿峰

漢家失鹿爭相逐江上一絲山水足夢裡龍蛇戰正  
酣羊裘之外何所欲釣竿偶擲化危峰掛月撐雲曾  
不曲君不見渭水垂綸一釣間享年八百資亭毒先  
生一釣成何事萬古令人仰高躅

夜宿盱江太平橋南

昨夜太平橋北宿今宵太平橋南眠橋南橋北只一  
水一水何曾有兩船若得詰朝天氣好從姑山上訪  
神仙神仙初亦是凡女欲海情枯斷愛纏一斷愛纏



蛇爲龍飛行自在獨超然

野鶴

千峰道人天邊鶴三年狀頭籠中雀天邊野鶴自在  
飛籠中飽雀甘束約松雲軒冕病不同幾人知病能  
服藥自笑少學屠龍術伎成無用渾棄却瓶錫袈裟  
到處遊楊枝漱口朝自嚼苦中有味頗清涼龍肝鳳  
肺輸寂寞

梵川問月攜麟郎覺生

吾問天邊月可曾有離別燕山與吳門幾見月圓缺  
或復海上生有時林間沒光輝在隱顯肯爲迷雲汨

君不見長安道傍蕭寺中焚香露坐月當空昨霄十  
八高人聚風月無邊爾復從又不見不傳之妙亂拋  
擲滿地珍珠誰拾得此情難借空虛喻摧破空虛須  
着力

送栗庵居士之南閩

道人自慚情未空憐君遠行心忡忡漳州一去四千  
里崎嶇不知經幾重分水嶺頭縣鳥道僮僕相呼晚  
與早何處寒雲猿狖啼日月不催雙髮老梁山見說  
多霜松松根抱石苔色濃幽期無負有如河爲予掃  
髮千岩中



趙州栢林寺壁間畫水

畫水何曾有水相有相焉能畫水狀靈臺無物湛然  
清信手風生掃成浪視之滾滾聽無聲日日波濤千  
萬丈此中未必無魚龍頭角潛藏待雷響君不明畫  
水之時念不生念生畫之終不成譬如陽春回大地  
紅白枝枝豈有情

送鶴林寺海祥禪人還南

千年常住一朝僧汝師獨爲常住死蚊蠅雖微尚貪  
生人而安能不愛此吾悲死者賦此詩莫言朽骨無  
所知幾回竹院月明夜幽魂嗚咽聲噫噫名藍未復  
往山之岡

靈峰觀泉

山水無心銜靈奇遊人分別生幽思幽思之初未分  
別山水靈奇誰得知就裡亦自有佳處有心不是無  
心時我遊靈峰峰不語淵默雷聲耳欲遺鰲頭戴我  
欲飛去拄杖挑雲何所之



七言律

山居

莫謂雲林是化城相逢幾箇世緣輕  
青山不解隨人老白髮偏知逐歲生  
萬境本空心作障一真無待道  
方成長安若問開先勝飯罷閒聽瀑布聲

仲夏同諸法侶禮多寶寺五百羅漢適有禪人  
跪讀法華經於像前靜而聽之若流泉寒瀉  
聲聲入耳靈臺澄徹樂而賦此

白日來叅伏虎禪衲衣誰共染香烟風塵有路通心  
地水月無人問性天空想玄庵翻貝葉遙知雷雨護



金田冷冷松下聽寒浪萬劫情根一洒然

咏懷

少小狂歌混狗屠翻然一旦醉醜翻胸中日月光無  
盡身外風塵患已祛虎豹由來山寺犬王侯誰悟利  
名奴閒朝何事堪消遣飯罷看雲獨倚梧

天啟禪房

石磴盤迴不記重亂峯深處隱禪宮泉從剝木雲間  
落僧住高岩眼界空欲了殘經還待月偶成半偈暫  
吟風歸來不覺烟霞晚谷口初聞定夜鍾

感懷二首

山重重兮水重重迷悟須知路不同冥寂場中幾似  
虎長安道上馬如龍白雲自解歸青嶂明月誰將掛  
碧空若使貴人能不從從教桃李笑春風

風塵那得此中幽萬壑千岩鎖一丘白髮不栽偏易  
長紅顏欲駐却難留飛禽有跡空中覓老衲無心物  
外遊試問故人槐國夢五更霜冷解惺不

瑠璃燈

誰把冰輪擲下方老禪拈取掛虛堂升沈雖復憑他  
力內外從來本自光未點金容猶冷淡纔燃寶座愈  
輝煌莫將龍燭堪相比不照人王照法王



過楞伽州遺麟郎

孤巖面面生雲烟無限魚龍開水天欲遣百非煩問  
荅那消一句蕩中邊不須設險人難到但若無來地  
自偏大慧日長何所事經殘抱膝看鷗眠

詠開先寺瀑布遺仲堅行脚作探竿影草

隱隱隆隆天上來白雲重疊不能羸剪裁無地容刀  
尺慣便乘風作雨雷到海終須涵日月出山豈肯染  
塵埃杖頭挑向諸方去席卷魚龍擔取回

聽松

水光山色世情空偶聽松風更不同無夢却遊天地  
外有身豈落死生中名高自古生心累道在何妨徹  
骨窮頽上棄瓢嫌聒耳寧知聲是大悲翁

舟次石門東岸訪寂音靈蹟兼懷廬山歸宗常

禪師

行盡溪山興未窮扁舟聊繫石門東金輪雨露承千  
古玉曆春風自九重鬢髮不愁連夜白身心已悟本  
來空何妨城市山林處瓶錫飄飄訪臥龍

山水縈迴妙莫窮烟濤空翠着禪宮石門有路憑舟  
楫金地無人候飯鐘雨助溪聲吞寂寞雲拖海色淬  
虛空重來一上楞伽閣徙倚長歌望祝融



偶成

閱世歸來隱半峰  
茅茨小結虎溪東  
了知我相無安處  
直得緣心當下空  
花落花開成敗夢  
漚生漚滅是非蹤  
相逢若問平生事  
坦腹高歌大塊中

墨光亭

選得幽居傍顧龍  
竹牀苔徑少人蹤  
閒朝有鶴松梢立  
靜夜無雲月正中  
夢裡山河乘想起  
眼前榮辱卽緣空  
名香自爇書經罷  
猶見陶泓墨氣濃

遺聞堂夜坐

來往風塵老客顏  
榻來高臥萬峰間  
從教世路千重

樂那得禪心一片閒  
空翠有情留白足  
炎蒸無夢到青山  
蔗漿一任能驅暑  
石上聽泉未可攀

登岳陽樓懷呂仙翁

見說先生醉此樓  
任教呼馬亦呼牛  
無緣濁世誰青眼  
得意滄波有白鷗  
一劔寒光天闕冷  
半瓢明月洞庭秋  
君山笑我登臨晚  
知爾還同旦暮遊

早渡嘉陵江登錦屏山

日上長巒渡彩虹  
隔江烟樹古蠶叢  
巖叢危峰欲墮松根  
抱浩露初殘花影空  
山水不殊前代色  
衣冠猶帶野人風  
白鷗訝我登臨晚  
來去飛鳴錦浪中



冬夜墨香庵懷方麓先生

十宅江村遠市塵相尋朝暮但耕人水邊習坐鏡中  
影月下經行夢裡身黃葉不須童子掃白鷗偏與野  
僧親著書日久知成癖好到禪房一養神

新秋

行踪誰料去還留洞壑俄驚夏已秋佛性喜隨雲自  
在禪心懶與水爭流身貧方外吾常分病少閒中福  
最優桐葉儘教飛萬片道人無事可生愁

過慈壽寺有感

惱亂禪心魔是詩恠將歲月廢浮辭念頭未起光無  
量情識生時苦不知抱甕灌園休道拙攻城雲棧謾  
爲奇何如石室披衣坐方寸澄來別有機

紺圍卽事

柴門不遣白雲封來去何須問主翁方寸高明千古  
鏡萬緣空寂一聲鍾涼生肝肺蓮花漏香泛簾櫳貝  
葉風鐵鉢願傾三昧水散成甘露洒寰中

聞秋聲有感

住住行行鳥莫猜因貪幽勝重徘徊烟霞自古非人  
世石瀨偏能洗客懷階下雲峰知幾疊巖石頭秋色恠  
先來舟藏石壑誰相負靜夜深觀念是媒



季春過竹院訪見素居士

萬竿竹影掃波光野曠風微麥浪香我輩自來多懶  
癖主人疎朗更相忘閣中棋局敲殘月池上峰巒接  
半堂鷗鳥不知塵世事飛來飛去看人忙

過陽羨蜀山弔蘇長公

來自黃州老此身青山流水隔風塵心同日月難逃  
謗名滿乾坤不救貧遷謫幾番生似夢文章終古氣  
如春清秋何處堪悲弔蜀阜荒祠一愴神

山居

相逢多勸罷仙遊行脚終難可到頭片月在天光不

斷千峰當戶翠常浮消閒石上題黃葉解渴雲邊飲  
碧流潦倒那堪聞此語感懷方且暫淹留

往曹溪暫憩長松館

幽居卜得在城中竹浪松雲草徑通習靜何須違萬  
化隨緣應不昧雙空燈前誰是青衫客月下時聞白  
社鍾路債今猶償未了曹溪禮鉢看降龍

過陶居士精舍不遇

高臥青山絕世埃柴門終日閉蒼苔雲連樹色室中  
暗竹引泉聲空裏來凡鳥不題遶佛地主人何處醉  
仙臺相逢未及探高論閒對玄猿一悵懷



初冬有感

炎威未已又寒來催得頭毛雪作堆樂事盡從忙裏  
錯憂懷應向靜中開死生若使饒尊貴道德應看等  
土埃情理皎然如黑白窮通壽夭不須猜

石門夜泛

撥草瞻風豈偶然百城迢遞舊因緣中流水月深還  
淺兩岸雲山斷復連諸子競誇天上坐片帆疑在鏡  
中懸石門鍾鼓相將動耳聽何如眼聽玄

示王宇望

壯志稜稜髮未蒼男兒莫負好時光清晨一念埋靈  
種白晝諸塵化德香世樂從來刀上蜜浮生迅速草  
頭霜超凡有路非天外日用明明不覆藏

夜坐聞于繆二生論友道

殺命仇讐恨未深相知辜負最難禁堅持劫外精勤  
願常省燈前感慨心世諦業緣非骨肉慈門靈種是  
真因此番失却菩提子苦海茫茫不易尋

唐奉常疑菴見訪次及楞嚴予喝之以爲禪者  
多不遜不揖而去賦此嘲之

雲林何事遠相尋破我蒼苔豈賞音蕉鹿夜來非好  
夢火牛古始救重侵多緣薄世尊危爵未必高言止



衆心既見不煩增傲想王生一叱直千金

謝劉司丞

但當淨意等虛空何必頻來訪遠公王事若將家事  
做世心便與道心同須知一死難高下自古浮雲易  
始終每笑閒身無所用縱觀山水走西東

宿方山昭化寺

有序

夫靈而最良者人也毒而最猛者虎也人遇至人  
大笑之虎見長者而馴伏人乎虎乎虎乎人乎必  
有知言者予聞長者之風有年矣快瞻遺像賦此  
千峰寂歷路迢遙長者苔龕乳虎號背嶺霜崖雲尚  
凍向陽林壑雪初消齒光法海澄松月舌相天風吼  
夜濤一自妙嚴投筆後雜華誰復繼揮毫

同傅侍御汪將軍禮方山大像

從來天地是岩龕妙相巍巍獨面南萬古燈傳憑日  
月一毛散影徧江山獻花野鳥飛空下出水蒼龍聽  
法酣回首白雲封絕頂證明功德共誰忝

述懷

江湖浪跡幾經霜不學禪狂學楚狂白髮有雙催我  
老青山無事笑人忙情消豈是將空遣習斷還須作  
觀忘杖屨飄然隨所住攀緣澹處卽家鄉



偶成

遠來水面覓遺踪道學西天龍樹同揮斥古今眠坐  
外雌黃凡聖笑談中書成紙價一時重理徹文章萬  
世雄更有一般蕭洒處死生無夢入心中

山中偶感

住來曾不見風塵野鹿常容伴法身碧海偏開雲外  
客青山冷笑世中人六龍朽索終難遠二鼠枯藤斷  
易鄰若使王侯知此事掛冠未必待清晨

秋日同澄公開侍者宿南臺

丹梯宛轉路迢遙興亟寧知杖屨勞明月滿臺消雪  
色白雲橫谷誤江濤金埒端許藏真骨寶偈能將化  
毒蛟吾道只今寥落甚爲誰流涕濕緇袍

睡起讀圓覺經

倏然草榻伴雲眠夢覺簷頭月正圓起念除嗔嗔轉  
熾生心捐妄妄尤添有無不立非爲妙人法雙忘亦  
未玄至道空虛誰敢擬思量已墮二三邊

奉答萬思默學憲

潦倒無心作解嘲乾坤誰復可論交澄潭信是蒼龍  
窟華屋終非野鶴巢飯罷祇堪閒坐臥詩成何必苦  
推敲遙知大范躑光景靜裏清虛恐未拋



墨香庵卽事示元廣二首

雨過何人策短筇道生擁毳自從容碧空無際雲初  
斷明月常來水不窮問法應須超意路尋香終是落  
行蹤吾家別有通玄處牢繫泥牛嶺上松

道在隨緣可遣情呼牛呼馬總閒名梅須遇雪方爭  
白竹爲當風始見清鏡上無塵光自滿雲邊有路鹿  
常行相逢若問山前寺流水泠泠雜磬聲

墨香庵示廣郎二首

村前村後盡烟波年來去年來足稻禾苔徑寂寥人不  
到霜天清曠月先過二茅遙隔長相憶半偈初成獨

自哦最愛無生琴調別顧龍山上磬聲多

野外蕭蕭風雨天支郎入夜未成眠人生若使還無  
老月闕何須惡不圓業在好山甘作客道成隨事斷  
攀緣窮靈未必非狂慧寧及香床未到禪

閒中感懷示廣郎

火宅炎炎唇吻乾蔗漿滿鉢有誰食隨流得妙從今  
入對境無心自古難水底搖紅花兩岸風前舞翠竹  
千竿年光若使常留在北闕何人肯掛冠

日暮瀟湘舟中

萬里歸來杖屨輕附舟又得坐經行櫓聲帆影供詩



料水色山光副客情  
弔古烟波殊有恨  
忘機鷗鳥自無驚  
黃昏停泊知何處  
雲外遙天月正明

結夏金壇之北園兼懷侯鐵菴

納涼何必獨夫容  
水木清幽趣亦同  
世上共高肥馬價  
林間單放病僧慵  
苔痕鶴過偶成字  
月影魚吞不解空  
更憶澹虛亭上夢  
寒雲片片嶺頭逢

吉安舟中望白鷺書院

樓臺一片水中央  
白鷺蕭蕭知幾霜  
兩岸青山雖不語  
千秋黃髮仰遺芳  
烟騰梵宇燒龍腦  
波撼書燈過客航  
莫道登臨終有日  
芒鞋踏遍使君腸

咏懷

少年屠狗混春秋  
誰料披緇作比丘  
俠習自慚忘未盡  
眞修方喜進無休  
安禪雲石爲床坐  
說法松風代舌頭  
唯剩閒身何所事  
山川重疊恣遨遊

喜王生元廣問法

四圍松竹護禪關  
布衲蕭蕭遠市闌  
清磬一聲塵夢斷  
白雲幾片道心閒  
天邊高鳥應須慕  
塔下蒼苔不可刪  
金地夜來誰問法  
共分燈火照癡山

仲冬懷覺休

暑往寒來老易驚  
乾坤誰復慰衷情  
花非得露終無



色松必因風始有聲任道自來千古重離家常若一  
毛輕相逢欲問黃河水少小曾經幾度清

大覺寺訪桂峰禪師

行盡溪山到梵居空林落葉遍階除閒消歲月燒龍  
腦功蓋吾曹賞鬢珠鴻信梁間懸貝葉鴉籌水上看  
芙蓉尋常飯訖無餘事自掬寒泉洗鉢盂

訪袁坤儀有感

擬採蘋花屢此遊桃源忽爾又清秋空巖蕭瑟松杉  
老澤國蒼茫蘭杜幽紫塞斷鴻雲外夢青山片雨客  
中愁維舟欲覓無風樹黃葉飛飛卒未休

喜于中甫過龍泉

瓶錫聊將寄此山千峰迢遞問巖龕長松影裡塵喧  
寂流水聲中月色寒靈骨不從身外覓神珠共向掌  
中看相逢有日休相負自古朝花露易殘

山中偶成

因厭風塵此閉關寸心清冷喻寒潭芟松放月墻頭  
上引水移天屋角間惟有禪書消白日更無人跡到  
青山相知莫笑謀生拙浩蕩乾坤幾箇閒

瀑布 二首

誰家千尺素絲抽高掛雲端永不收已悟源頭來處



遠肯將根脚混常流從他妙手應難剪許我閒心分  
自投此去定當歸大海待看波浪溼天浮  
欲投滄海作波瀾豈憚千重鳥道難响奪磬聲雙劍  
冷光吞月色一鑪寒銀河倒瀉青天外玉樹孤懸碧  
嶂間幾度天風吹不斷爲留雲壑伴僧閒

秋日禮清涼塔

人代風烟知幾霜石面靈骨自珍藏珠林倒影天垂  
蓋寶塔鳴空地擁幢澤被乾坤歸夢杳春廻岩谷煉  
泥香重來盡敬增悲慨落木秋高舊影堂

山中雜咏 二首

大乘何必斷攀緣小隱還須遠市廛習定水邊觀皓  
月消閒樹裡看青天心中有欲山非靜世上無求地  
自偏恠底相知歸計緩巢陵寂寞鎖重烟  
野曠風高一壯觀爲誰談笑斗牛間憑欄自覺青天  
近下界寧知白日閒岳色橫空簾外墮海濤喧闐坐  
中寒登臨未盡狂奴興茗碗悲歌行路難

山居咏懷 二首

補袖閒中拾斷麻肯將泉石易浮華光生甕牖東山  
月香散經壇上界花夢裡英雄勞白起古來驕主笑  
夫差隆之富貴欺高國自鑿池水自煮茶



茫茫苦海正波濤莫若逃禪計最高世路已驚心不  
死功名猶夢髮先凋因甘白粥忘枯淡却恠蒼苔分  
寂寥樂極只緣貧到骨巢由未許讓前茅

贈永慶寺秀峰法師

塵機少小便知休瓶鉢蕭然隱伏牛明月有光難自  
晦白雲無累易相留狂猿不可驚禪虎攫獸何曾異  
海鷗說法年來煩水石斷崖瀑布爲誰流

招隱

死生兩字事非輕恠底癡人不自驚萬里黃金窮口  
腹滿頭白髮戰功名閭公豈貴屠龍技田子何須學

狗鳴早晚歸來雲外寺夜深松火閱傳燈

雪中登蘆芽有序

予寓吳中楞嚴忽夢登一山疊嶂重巒萬松映雪  
覺而舉似開侍者且曰吾今號松雪矣開口願以  
雪松字開蹠而請甚堅遂許之茲登蘆芽訪妙師  
適逢大雪宛然當年夢境也感而賦此

數年杖錫走江湖一旦蓬蒿化淨居虎踞岩頭關世  
路泉飛樹杪入天厨每因煮茗煩燒葉猶愛看山嬾  
讀書夢境曾來同鉢食只今松雪竟何如

與蘆芽主人談世故有感



雲屋寥寥冰雪重燈前盃茗論英雄情關未破寧無  
失世路相遭豈易公共飲每憐愁不共同床未必夢  
相同年來多少傷心事總付瞿曇妙觀中

寄袁了凡居士水齋

華嶽山人辟穀方先生獨得已休糧懸知天上增仙  
籍豈戀人間轉燭光玉液常吞肝肺潤金丹能轉鬢  
毛蒼青山不遠終相見知己新添一少郎

龍嘴

有序

日光之前有嶺稜稜垂於磎旁勢若虬然曰龍嘴  
嘴上茅庵初結喜其清曠且有二禪者轉經於此

一雜華一蓮華予由梵仙而下適聞音響泠泠賦  
此

鳥道盤迴不易登此中清曠愜幽情陰籠翠嶺春雲  
度影落空潭海月生山菜儘堪供瓦鉢道人偏喜聽  
蓮經泠泠滴向焦腸裡寶所休將喻化城

曲阿書經卽事

敝廬故有不誅茅况隔青山遠市朝野衲披雲常自  
到主人護法豈知勞孤燈花落搖紅影萬竹風生涌  
翠濤若使貴人能駐景巢由豈肯臥蓬蒿

秋夜石經山禮琬公靈骨

有序



凡血氣必有知有知則有欲有欲則有生有生則  
有死唯至人能以無生治人欲欲空則知不廢而  
妙用無方矣隋琬公閱南嶽思大師發願文知未  
法運窮三灾倏起一切法藏皆當盡滅喟然嘆曰  
有天地不可無日月有作息不可無衣食有人生  
不可無佛法然日能照晝不能照夜月能照夜不  
能照晝衣能遮人之寒不能使時不寒食能濟人  
之饑不能使年不饑惟佛法之妙不惟使天地終  
古長且羣有死生無患以至鑄凡爲聖卽暗爲明  
達生無生以大願力兼萬有一而普濟之則廣大殊

勝豈可思議者哉乃刊石爲經續佛法壽延及慈  
氏行恐古今代謝巖壑變遷以佛舍利并已骸骨  
藏諸石窟填撫茲山矢大法藏永劫無毀予感公  
之憂深而慮遠也含涕賦此

月夜青山謁琬公石堂無語對千峰蓮花片片皆心  
血貝葉行行奪化工靈骨可埋名不朽法身非相用  
常通那堪更向蒼崖上鑿室藏經示不窮

### 問竹亭卽事

策杖深林問此君空亭誰復謝塵紛青山不禁長年  
住流水何須獨自聞髮髮如霜難遣黑利名非酒大



家昏輸他定起千峰裡  
削握琅玕掃白雲

五言絕

蕭崗望方茅諸山

有濤可傾耳何必千尺松  
偶此藉芳草春山當遠空  
咏雪

出谷幽雲細成花大地陰盡翻桃李  
夢潔白本來心

禮拜石

慢幢高須彌能折必自重  
安得離欲尊頻來此獻供  
洗衣泉

松邊剪碧霞偶爾成袈裟披久亦何染  
閑將飄浪花  
觀流石



路在層峰外扶筇向深壑  
跣趺水聲中靜看飛寒瀑  
同遊法侶散坐松岡  
叔宗忽浮小舟入柳陰  
宛然有孤鴈沒空之致賦此

樹禪

空山木上座坐石不知年  
歲月無心記風柯舌相全  
鐵袈裟

天造福田衣何年施禪伯  
厭重拋雲邊風吹與日炙  
爾庵雜咏

竹靜雨初歇風和鳥健鳴  
書殘成獨睡無夢繞江城  
芭蕉菴

月臺疑近壑鱗石欲生雲  
誰謂塵囂裡幽居讀梵文  
楞伽洲

斷澗蒼山裂飛梁老樹眠  
朝來扶杖處雲度水中天  
題畫

水曲山頻合春寒花倦開  
盱江來復去人在畫圖回  
題竹塢石室

何處無青山片心灰冷難  
片心灰冷易智拔萬重關  
講經臺

尊者身相空舌根何所寄  
松風與流水說盡無生義



初祖亭

面壁不說法此心誰復傳神光三拜後震旦五燈懸  
錢資蕩蕩三首

青山點樹杪斜日照溪灣試問錢資蕩滄波長夜寒  
望裏水高船却疑空墮天既到平如掌人聲鏡裏傳  
見水心卽了逢山眼便開生平窮伎倆此外復何懷

利刀

利刀日切泥鋒芒漸鈍置若向沙石礪斬鐵如斫水

夜坐

夜坐空階寂清言絕妄梯回看雲樹杪不覺月沈西

雲墮石

飛回因閱世墮此不知春擬欲挑將去恐驚林下人  
望玉臺卽懷

一峰秀雲外玉立望不厭坐此未須臾六虛方寸贍  
題萬玉庵

說法石

誰將崑崙峰一斧千百塊散洒天目間古今無謝代  
清清澗水邊冷冷奇石下大哉衆中尊爲說無生話  
單傳崖

少林曾斷臂五乳血腥高末後誰三拜中雲雪並腰



示匡石居士

拈書相示處石火電光遲纔擬生心  
蒼松風知未知  
山中咏松

絕頂凌峰寂長年不改青幾回良月夜倚杖聽濤聲  
天啓石

行到深雲裏沉冥孰可識不見太古人只見太古石  
崑石

崑崙太崔巍飛劍斬其頂置之几席間烟雲朝夕暝  
過巖灘

帆飽客舟輕由來飲德名難逢今夜月見月見先生

獅吼臺

飛者不敢飛走者不敢走箕踞寥廓中靜聽獅子吼  
歡喜泉

愛爲煩惱根愛盡煩惱空方寸同此水誰無歡喜容  
清深崖

萬物始乎水六情始乎動一心苟不生清深在日用  
甘露泉

寒流我慣枕消渴非口飲雖弗愛長生心地清涼甚  
朗公石

朗公初不處謂處不知朗試看朗公岩頽然誰觀想



托鉢峰

誰伸黃金手笑托碧玉鉢  
歡喜施將來福源永無竭  
本湛泉

韋陀峰

石縫瀉流水見之心湛然  
是誰掬嗽齒吸盡空中天  
我笑叉頭石爭如韋馱峰  
儼然大悲側草木增威風  
重遊黃花洞

棄馬陟危峰盤廻知幾重  
蒼岩開石室共聽雜華鐘  
贈龍泉關劉善友之峨眉

五峰與三峨相去路無多  
想念纔生處蒲衣笑薜蘿

爾庵雜咏

鶴解聽僧語魚爭候梵音  
海門明月上何處讀書聲  
冷巖

源從雲外來豈止千萬折  
愁臥冷巖上一嘯驚天關  
綠瓊

行倦逢綠瓊欣然欲一坐  
縱橫紫翠虬噴薄晴雲破  
湖心寺懷堅光趙居士

海上明月生大空浮雲橫  
清光照衡門須待天風鳴  
辭澹然居士齋

白雲本無心有期則有跡  
何如無期好隨風靡不適



登虎丘

我愛虎丘雲去來初無心遊人嘆霸業削壁多微陰

其二

我愛虎丘月清光鎮澗澈悲欣幾萬重普照無分別

其三

我愛虎丘石談經解點頭生公去不返長抱白雲幽

偶成

胸次千竿竹眉邊萬頃梧清音常染耳遺聽卽爲魚

其二

願留大馬骨努力報慈恩猶若湘江水滋軋更潤坤

贈海通居士

殘臍逢高閣溪山烟霧深當勤持半偈終出海通心

玄帝閣望石門寺懷湯遂昌

紅魚飛碧嶺白鳥點青林楚越皆初地相逢孰賞音

開先龍潭

地裂潭初就天開瀑始懸老龍如不在何物起雲烟

元素庵坐栢

酒客窺簾下雲禪坐栢根不因摩詰手誰復寫元真

貯碧軒

萬竹凝空翠方池貯碧流小橋通別圃抱石白雲幽



讀茅山志

夜讀茅山傳無生有幾人都來長視者花落一年春  
佛香子曰觀此詩意若使無生則不有死如既生  
矣欲鑄生不死恐無此理若欲長生先須忘生良  
以生忘則死媒絕矣如能無生則忘生之說又在  
下風耳或萬年爲一年或萬年爲一日或三百六  
十日爲一年或以頃刻爲長劫此皆念後事也如  
能泝而上之則念且不有所謂年月日劫豈非計  
龜之生毛乎



